

T-6

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva finansija, Vlada Zeničko-dobojskog kantona, na 103. sjednici, održanoj dana 22.04.2021. godine, d o n o s i

## ZAKLJUČAK

### I.

Prihvata se Mišljenje Ministarstva finansija Zeničko-dobojskog kantona broj: 07-23-18672-2-1/20 od 09.04.2021. godine, kojim se Inicijativa Euroherc osiguranja i grupe 15 drugih osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon („Službene novine Zeničko-dobojskog kantona“, broj 9/09 i 13/11 - autent. tum.), ocjenjuje neprihvatljivom.

### II.

Zaključak sa Mišljenjem iz tačke I. upućuju se u dalju skupštinsku proceduru.

### III.

Zaključak stupa na snagu danom donošenja.

Broj: 02- 02-5907/21  
Datum, 22.04.2021. godine  
Zenica



**PREMIJER**  
po ovlaštenju

*Spahija Kozlić*

DOSTAVLJENO:

1x Ministarstvo finansija,  
1x Skupština Zeničko-dobojskog kantona,  
1x Stručna služba Vlade,  
1x a/a.



Broj: 07-23-18672-2-1/20  
Datum, 09.04.2021. godine

## STRUČNA SLUŽBA VLADE

Na osnovu **Inicijative Euroherc osiguranja i grupe 15 drugih osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon** ("Službene novine Zeničko-dobojskog kantona", broj 9/09 i 13/11 - autent. tum.), a u vezi sa članom 112. stav 1. i 2. Poslovnika Skupštine Zeničko-dobojskog kantona - Treći prečišćeni tekst („Službene novine Zeničko-dobojskog kantona“, broj: 14/18, 18/18-isp., 7/19 i 7/20), dostavljamo Vam slijedeće

## MIŠLJENJE

Zeničko-dobojskom kantonu je dostavljena Inicijativa **Euroherc osiguranja i grupe 15 drugih osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon** ("Službene novine Zeničko-dobojskog kantona", broj 9/09 i 13/11 - autent. tum.).

Cilj navedene Inicijative je "pojednostavljanje registracije vozila", na način da izmjenom i dopunom Zakona o porezu na imovinu, naslijeđe i poklon, obveznici poreza na imovinu na motorna vozila i dalje budu obavezni da plaćaju porez na imovinu prilikom registracije vozila, ali da više ne budu obavezni da podnose porezne prijave Poreskoj upravi prilikom registracije vozila.

Naime, članom 23. stav (4) Zakona o porezu na imovinu, naslijeđe i poklon ("Službene novine Zeničko-dobojskog kantona", broj 9/09 i 13/11 - autent. tum.), propisano je:

"Prijavu poreza na imovinu na motorna vozila obveznik podnosi prilikom registracije vozila",

a članom 24. stav (2) istog zakona je propisano:

"Porez na imovinu vozila plaća se pri registraciji vozila".

Kako je članom 3. Zakona o porezu na imovinu, naslijeđe i poklon ("Službene novine Zeničko-dobojskog kantona", broj 9/09 i 13/11 - autent. tum.), propisano je da se prihodi od poreza na imovinu "raspoređuju 100% u budžete općina", Ministarstvo finansija je navedenu Inicijativu dostavilo Savezu općina i gradova FBiH, radi pribavljanja njihovog mišljenja po navedenom pitanju.

Naime, odredbama člana 34. stav 4. Zakona o principima lokalne samouprave u Federaciji BiH ("Službene novine Federacije BiH", broj: 49/06 i 51/09), propisano je: "Zakonodavac je dužan pribaviti mišljenje od Saveza općina i gradova o svim pitanjima koja se odnose na dodjelu sredstava, kao i o svim promjenama zakona koje mogu utjecati na finansijske obaveze jedinica lokalne samouprave."

Savez općina i gradova Federacije BiH je proveo proces konsultacija u vezi s navedenim pitanjem među općinama i gradovima u Zeničko-dobojskom kantonu. Po ovom pitanju su se izjasnili Grad Zenica i Općine Tešanj i Olovo, koji u svojim mišljenjima i stavovima nisu podržali navedenu Inicijativu.


U Mišljenju broj: 82/21 od 17.03.2021. godine Saveza općina i gradova Federacije BiH na pomenutu Inicijativu, navedeno je da bi prihvaćanje Inicijative Euroherc osiguranja i grupe 15 drugih osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon, „moglo dovesti do otvaranja prostora poreznoj evaziji i smanjenju naplate prihoda po osnovu poreza na imovinu. Budući da prihodi od poreza na imovinu u 100%-tnom iznosu pripadaju jedinicama lokalne samouprave s područja ZDK, smanjenom naplatom ovih prihoda bi se smanjili prihodi u proračunima/budžetima jedinica lokalne samouprave u ZDK, što nije prihvatljivo za SOGGBiH kao zakonskog zastupnika općina i gradova u FBiH i zaštitnika njihovih interesa. Sukladno tomu, Savez općina i gradova FBiH inzistira da se uvažavaju sva mišljenja i stavovi jedinica lokalne samouprave s područja Zeničko-dobojskog kantona na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon Zeničko-dobojskog kantona.“

Imajući u vidu navedena mišljenja i stavove Saveza općina i gradova FBiH, te gradova i općina sa područja Zeničko-dobojskog kantona, a kako se u skladu sa Zakonom o porezu na imovinu, naslijeđe i poklon, prihodi od poreza na imovinu “raspoređuju 100% u budžete općina”, Ministarstvo finansija je mišljenja da se iz navedenog razloga, predmetna Inicijativa ne treba prihvatiti.

S poštovanjem.

**DOSTAVLJENO:**

Naslovu,  
 a/a.



**MINISTAR**

*Josip Lovrić*





Broj: 02-1-23-18672-2/20  
Zenica, 10.12.2020. godine

02

MINISTARSTVO FINANSIJA  
N/R MINISTRA

**PREDMET: Mišljenje po Inicijativi Euroherc osiguranja i grupe osiguravajućih društava, traži se**


U prilogu Vam dostavljamo akt Stručne službe Skupštine Zeničko-dobojskog kantona, broj: 01-23-18672-1/20 od 04.12.2020. godine, kojim se prosljeđuje Vladi Kantona na mišljenje Inicijativa za izmjenu i dopunu Zakona o porezu na imovinu, naslijeđe i poklon („Službene novine Zeničko-dobojskog kantona“, broj: 9/09 i 13/11), podnesena od strane Euroherc osiguranja i grupe 15 drugih osiguravajućih društava iz Zenice.

S obzirom da je Inicijativa podnesena u skladu sa članom 111. i 112. Poslovnika Skupštine Zeničko-dobojskog kantona („Službene novine Zeničko-dobojskog kantona“, broj: 7/12 i 12/13) i kako se od Vlade traži mišljenje, potrebno je da pripremite akt za sjednicu Vlade u formi i u obliku u kome će biti donešen, a u skladu sa Poslovníkom o radu Vlade Zeničko-dobojskog kantona („Službene novine Zeničko-dobojskog kantona“, broj: 5/11).

S poštovanjem,

Prilog:  
- kao u tekstu.

Dostavljeno:  
 Naslovu,  
 a/a.





Broj: 01-23-18672-1/20  
Zenica, 04.12.2020. godine

02-2  
h/

- VLADA ZENIČKO-DOBOJSKOG KANTONA
  - n/r premijera Kantona
  - n/r sekretara Vlade
- ZAKONODAVNO-PRAVNA KOMISIJA SKUPŠTINE- svim članovima putem Odjeljenja za poslove radnih i drugih tijela Skupštine i radno-pravne poslove-04

**PREDMET: Inicijativa Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon ("Službene novine Zeničko-dobojskog kantona", broj: 9/09 i 13/11) - dostavlja se,**

Euroherc osiguranje i grupa 15 drugih osiguravajućih društava iz Zenice je 04.12.2020. godine, Skupštini Zeničko-dobojskog kantona podnijelo inicijativu za izmjenu i dopunu Zakona o porezu na imovinu, naslijeđe i poklon ("Službene novine Zeničko-dobojskog kantona", broj: 9/09 i 13/11).

Navedena inicijativa se, u smislu člana 111. stav 1. Poslovnika Skupštine Zeničko-dobojskog kantona – Treći prečišćeni tekst („Službene novine Zeničko-dobojskog kantona“, broj: 14/18, 18/18-Isp., 7/19 i 7/20) može smatrati inicijativom za donošenje zakona o izmjeni i dopuni navedenog Zakona, te vam istu, shodno članu 112. stav 1. Poslovnika Skupštine Zeničko-dobojskog, dostavljamo na mišljenje s prilogom kao u tekstu, o kojoj ste se, u smislu stava 2. člana 112., dužni izjasniti u roku od **30 dana**, radi daljeg postupanja Skupštine po istoj u skladu s Poslovníkom Skupštine.

S poštovanjem!

SEKRETAR  
*Ibrahim Avdagić*  
Ibrahim Avdagić

Prilog: kao u tekstu

**Dostavljeno:**

- 1x Naslovu
- 1x Poslanicima Skupštine ZDK/05-03
- 1x Ministarstvu finansija ZDK, n/r ministra-na znanje
- 1x Euroherc osiguranje, ul. Goraždanska 28, 72000 Zenica, n/r Kajić Vlatko -na znanje
- 1x U predmet – „R“/05-02



Boško

**Skupština Zeničko Dobojskog kantona**

ZENIČKO-DOBOJSKI KANTON			
PRIMLJENO:	04-12-2020		
Org. jedinica:	Služba za	za	za
01	23	10/12	20

**PREDMET : INICIJATIVA OSIGURAVAJUĆIH DRUŠTAVA ZENICA**

*Poštovani*

*Ovim putem vam se obraćamo kao kompetentne firme koje će navesti jako puno razloga za ukidanje ovjere ovjerenog koji traje od davne 1998g. Molimo vas da uvažite našu inicijativu iz više razloga . Plaćanje poreza za putničko vozilo bi i dalje ostalo na snazi kao i sve druge dadžbine ali mi se zalažemo da pojednostavimo registraciju vozila nama strankama, poreskoj kao i Mup-u .Da bi se jedna registracija produžila treba 3 a-4 papira pored uplatnice koju je uplati za porez, za uvoz treba 4 papira a-4 za kupljeno iz uvoza 5 papira a-4 da se nose u poresku i da oni ovjere da je stranka uplatila 10,20,25,km ili već koliko pored uplatnice iz koje se jasno vidi da se porez platio. Sad zamislite 15 osiguranja 10-tak agencija svaki dan se registruje 100-150 vozila koliko je to papira ,goriva, vremena i bez potrebnih pečata. Molimo vas da nam pomognete i da ovu nepotrebnu situaciju ukinete i da budemo kao i svi kantoni u BIH jer ovo nitko nema. U Zenici ima 30 000 registrirani vozila možete zamisliti koliko je to papira . U poreskoj su podržali ovu inicijativu i čvrsto vjeruju da će te donijet odluku koja će olakšati registraciju vozila. Kao prilog ovom zahtjevu ovjera od svih osiguranja koja djeluju u gradu Zenici i koji žele da se ovo ukine.*


**HVALA**

**Molimo vas da nam odgovorite na adresu Euroherc osiguranje ul.  
Goraždanska 28 Zenica jer je gos. Kajić Vlatko kao djelatnik osiguranja i  
aktivirao ovu inicijativu**

**Zenica 4.12.2020**

Spisak osiguranja koji su podržali inicijativu za ukidanje ovjere poreza

1. Euroherc osiguranje
2. Adriatic osiguranje
3. Aura osiguranje
4. Croatia osiguranje
5. Sarajevo osiguranje
6. Uniqa osiguranje
7. Camelia osiguranje
8. Brčko gas osiguranje
9. Central osiguranje
10. Triglav osiguranje
11. Premium osiguranje
12. ASA osiguranje
13. Garant osiguranje
14. Mikrofin osiguranje
15. „Dunav osiguranje
16. Wiener osiguranje



Broj:13-4/1-45-1-4928/20

Zenica, 24.11.2020. godine

**EUROHERC OSIGURANJE I DRUGI  
ZENICA**

PREDEMET: Obavijest

Dana 12.11.2020 godine ovaj organ zaprimio je vaš akt kojim tražite da ovaj organ prestane ovjeravati prijave poreza na imovinu za motorna vozila ističući da se time stvaraju velike gužve kako u Poreznoj upravi tako i u Ministarstvu unutrašnjih poslova Zeničko-dobojskog kantona. Nadalje pominjete da je takva praksa u drugim kantonima kao što su Sarajevski i Srednjo-bosanski kanton te da bi se na taj način postigle velike uštede.

U vezi sa traženim ističemo da je predmetna tematika regulisana Zakonom o porezu na imovinu, naslijeđe i poklon Zeničko-dobojskog kantona(Sl.novine Zeničko-dobojskog kantona broj: 9/09 ). Članom 4. Zakona propisano je između ostalog da porez na imovinu plaća fizičko i pravno lice koje je vlasnik ili korisnik putničkog automobila osim taksi vozila. Članom 23. stav 3. istog zakona striktno je propisano da prijavu poreza na imovinu na motorna vozila obveznik podnosi prilikom registracije vozila.

Pozivanje na činjenicu da u pojedinim kantonima ne postoji obaveza podnošenja prijave poreza a imovinu na motorna vozila Poreznoj upravi, nema uticaja na odluke ovog organa obzirom da je u tim kantonima zakonom izuzeto podnošenja predmetnih prijava Poreznoj upravi. Tako je Zakonom o porezu na imovinu Kantona Sarajevo u čl. 7.stav.2 striktno propisano da obveznici poreza na imovinu koja podliježe registraciji ne podnose poreznu prijavu, a porez plaćaju prilikom registracije.

Uvažavajući i razumjevajući vaše zahtjeve napominjemo da Porezna uprava nastupa kao izvršni organ u okviru svoje stvarne nadležnosti u skladu sa zakonima koji regulišu istu te nema mogućnosti niti ovlaštenja da uvede praksu odnosno postupanja koja nisu u skladu sa pozitivnim zakonskim propisima.

Imajući u vidu naprijed navedeno ovim putem vas obaviještavamo da možete u skladu sa članom 111. Poslovnika Skupštine Zeničko-dobojskog kantona predsjedavajućem Skupštine Zeničko-dobojskog kantona podnijeti inicijativu za izmjenu odnosno dopunu člana 23. Zakona o porezu na imovinu, naslijeđe i poklon Zeničko-dobojskog kantona te na taj način utvrditi osnovanost vaših zahtjeva.

S poštovanjem !

Dostavljeno:

- Naslovu 1x
- Podnosiocima zahtjeva 5X
- A/a 1x

Šef ispostave



Kustura-Imamović Semina dipl. pravnik

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO- DOBOJSKI KANTON  
MINISTARSTVO FINANCIJA  
N/r gđin. Josip Lovrić, ministar**

Sarajevo, 17.3.2021.

Broj: 82 /21

**PREDMET: Mišljenje Saveza općina i gradova Federacije BiH na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon Zeničko-dobojskog kantona (veza: Vaš dopis broj 07-23-18672-1-1/20 od 25.2.2021. godine) , dostavlja se**

Poštovani,

Savez općina i gradova Federacije BiH (SOGFBiH) je, povodom Vašeg zahtjeva za dostavljanjem mišljenja na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon Zeničko-dobojskog kantona, koja predlaže da obveznici poreza na imovinu na motora vozila ne bi bili obvezni podnositi porezne prijave Poreznoj upravi prilikom registracije vozila, proveo proces konzultacija po ovom pitanju među općinama i gradovima u Zeničko-dobojskom kantonu. Po ovom pitanju izjasnili su se Općina Olovo, Općina Tešanj i Grad Zenica, čija mišljenja Vam dostavljamo u prilogu ovog dopisa.

Kao što su jedinice lokalne samouprave u ZDK naznačile, **ukazujemo na diskutabilnost i neizvjesnost postojanja odgovarajućeg kontrolnog mehanizma naplate prihoda od poreza na imovinu pri registraciji motornih vozila u prijedlogu izmjena Zakona s ciljem „pojednostavljenja registracije vozila“ predstavljenim u inicijativi osiguravajućih društava**, što bi moglo dovesti do otvaranja prostora poreznoj evaziji i smanjenju naplate prihoda po osnovu poreza na imovinu. Budući da prihodi od poreza na imovinu u 100%-tnom iznosu pripadaju jedinicama lokalne samouprave s područja ZDK, smanjenom naplatom ovih prihoda bi se smanjili prihodi u proračunima/budžetima jedinica lokalne samouprave u ZDK, što nije prihvatljivo za SOGFBiH kao zakonskog zastupnika općina i gradova u FBiH i zaštitnika njihovih interesa. Sukladno tomu, *Savez općina i gradova FBiH* inzistira da se uvažavaju sva mišljenja i stavovi jedinica lokalne samouprave s područja Zeničko-dobojskog kantona na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon Zeničko-dobojskog kantona.

S poštovanjem.

**DIREKTOR SAVEZA**

**Vesna Travljanin, mr.sci.**

**Prilog:**

- **Mišljenje Općine Olovo**
- **Mišljenje Općine Tešanj**



SAVEZ OPĆINA I GRADOVA FEDERACIJE  
BOSNE I HERCEGOVINE  
Association of municipalities and cities of the  
Federation of Bosnia and Herzegovina

- **Mišljenje Grada Zenica**

**Dostavljeno:**

- **Naslovu**
- **a/a**

---

Musala 5/1 71000 Sarajevo

**Tel:** +387 (0)33 216 502; +387 (0)33 209 024; +387 (0)33 209 120; +387 (0)33 552 811

**Fax:** +387 (0)33 552 810; +387 (0)33 216 502 / **Email:** savez@sogfbih.ba / **Web:** www.sogfbih.ba

## Grad Zenica-Mišljenje na Inicijativu Euroherc osiguranja za izmjenu i dopunu Zakona o porezu na imovinu, naslijeđe i poklon ZDK

Poštovani,

Vežano za predmetnu Inicijativu Euroherc osiguranja za izmjenu i dopunu Zakona o porezu na imovinu ("Službene novine ZDK", broj: 9/09 i 13/11), naslijeđe i poklon ZDK, kojom bi se član 23. stav 4. izmijenio, odnosno Zakon dopunio, na način da obveznike poreza na imovinu na motorna vozila oslobađa od obaveze podnošenja prijave prilikom registracije vozila, smatramo da se ona može podržati uz obavezan stav Porezne uprave FBiH, Kantonalnog poreznog ureda Zenica da izostanak podnošenja prijave obveznika poreza na imovinu na motorna vozila neće otežati evidenciju i praćenje naplate, zbog čega bi moglo doći do pada ostvarenja prihoda po ovom osnovu.

Naime, u Obavijesti koju je Porezna uprava FBiH, Kantonalni porezni ured Zenica, Porezna ispostava Zenica dostavila osiguravajućim društvima u Zenici, na njihov zahtjev da Porezna ispostava Zenica prestane ovjeravati prijave poreza na imovinu na motorna vozila, podnosioci zahtjeva se upućuju na postupak podnošenja Inicijative koja bi mogla da dovede do ostvarenja njihovog zahtjeva. U navedenoj Obavijesti se ne govori o mogućim posljedicama provođenja njihovih zahtjeva.

Dakle, ukoliko bi prestanak podnošenja prijave prilikom registracije vozila mogao da dovede i do najmanjih poteškoća u kontroli i naplati prihoda po osnovu poreza na imovinu na motorna vozila, nismo saglasni sa predmetnom Inicijativom. Mjerodavan stav u pogledu posljedica, koje izmjene i dopune Zakona po navedenoj Inicijativi mogu proizvesti na postupak evidencije i praćenja naplate, odnosno u konačnici na iznos ostvarenih prihoda po ovom osnovu, jedino može dati Porezna uprava FBiH, Kantonalni porezni ured Zenica (a ne ispostave u gradovima/općinama), koji kao izvršni organ, putem ispostava provodi navedene poslove.

Uostalom, ostvarivanje ušteda za osiguravajuća društva u ZDK i izbjegavanje stvaranja velikih gužvi u Poreznoj upravi i MUP ZDK, možda se može postići na neki drugi način (npr. da se prijava ne podnosi prilikom registracije vozila, nego u roku od npr. 15 dana, kao što je u istom Zakonu, u članu 23. stav 2. definisano za imovinu koja se stekne u toku godine ili eventualno uvođenje podnošenja prijave elektronskim putem), opet, ukoliko Porezna uprava FBiH, Kantonalni porezni ured Zenica smatra da se time ne ugrožava naplata prihoda od tog poreza.

Lijep pozdrav

SLUŽBA ZA FINANSIJE



**Služba za ekonomske poslove**

Datum: 04.03.2021. godine  
Naš znak: 04-12-1-289/21

**Savez općina i gradova FBiH**

Musala 5/1  
71000 Sarajevo

**PREDMET: Mišljenje na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon ZDK, dostavlja se**

Poštovani,

Dana 03.03.2021. godine Općina Olovo zaprimila je Vaš zahtjev za dostavljanje mišljenja na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon ZDK, prosljeđen od strane Ministarstva finansija Zeničko-dobojskog kantona. Cilj navedene Inicijative, kako je navedeno u zahtjevu, je „pojednostavljenje registracije vozila“, na način da su obveznici poreza na imovinu na motorna vozila i dalje obvezni plaćati porez na imovinu prilikom registracije vozila, ali da više ne budu obvezni podnositi porezne prijave Poreznoj upravi prilikom registracije vozila.

Podnošenje prijave poreza na imovinu pri registraciji motornih vozila (Obrazac PR-I) propisan je članom 23. stav (4) Zakona o porezu na imovinu naslijeđe i poklon („Službene novine ZDK“, broj: 9/09 i 13/11 – autentično tumačenje). Članom 3. Zakona utvrđeno je da se prihodi od poreza na imovinu raspoređuju 100% u budžete jedinica lokalne samouprave s područja Zeničko-dobojskog kantona.

Nakon zaprimanja Vašeg zahtjeva, u cilju pribavljanja informacije o iskustvima prilikom zaprimanja prijave poreza na imovinu pri registraciji motornih vozila, kontaktirali smo Poreznu ispostavu Olovo. Nadležni u Poreznoj ispostavi Olovo, na osnovu dosadašnjeg iskustva, potvrdili su da je prilikom naplate poreza na imovinu korisnika ili vlasnika putničkih automobila, osim taksi vozila, bilo dosta propusta i neispravno ili nikako uplaćenog poreza na imovinu.


Prijedlog za izmjenu i dopunu Zakona o porezu na imovinu, naslijeđe i poklon ZDK „možda“ bi pojednostavio proceduru registracije vozila, međutim, postavlja se pitanje ko će vršiti kontrolu i naplatu poreza na imovinu pri registraciji motornih vozila.

Imajući u vidu dosadašnja iskustava Porezne ispostave Olovo, ukoliko ne bi postojao kontrolni mehanizam naplate, procjenjujemo da će doći do smanjenja naplate prihoda po osnovu poreza na imovinu a što ne ide u prilog jedinicama lokalne samouprave.

S poštovanjem!

Dostavljeno:

1. Naslovu
2. u evidenciju
3. a/a



POMOĆNIK NAČELNIKA

Merisa Kaljanac, dipl.oecc.



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK**

Broj: 04-1-22/21

Datum: 08.03.2021.godine

**Savez općina i gradova Federacije BiH**

**PREDMET: Mišljenje na inicijativu Euroherc osiguranja, dostavlja se**

*Veza: Akt Ministarstva financija ZE-DO kantona dostavljen Savezu općina i gradova FBiH sa zahtjevom za mišljenjem na Inicijativu Euroherc osiguranja i grupe osiguravajućih društava iz Zenice za izmjenu i dopunu Zakona o porezu na imovinu, naslijeđe i poklon ZDK.*

Poštovani,

Općina Tešanj smatra da navedena inicijativa nije prihvatljiva iz slijedećih razloga:

„Način na koji se vrši prijava i uplata pozera na promet kod registracije vozila ima ugrađen kontrolni mehanizam koji funkcioniše besprijekorno.

Naša praksa je pokazala da, ukoliko nema ovakvog mehanizma institucionalne prijave putem Porezne uprave, dolazi do utaje poreza i otvaranje puta malverzacijama.

Prihvatanjem inicijative, došli bismo u situaciju da niko ne bi mogao provoditi kontrolu obračuna i uplate prihoda, budući da Ministarstvo unutrašnjih poslova nema tu obavezu.

Radi se o tome da bi obveznik poreza kao dokaz prilagao nalog za plaćanje da je porez na imovinu uplaćen, a objektivno službenik CIPSA niti ima uvid, niti je nadležan, da iskontorliše da li je to u skladu sa obračunom koji sada (po novom prijedlogu) niko ne bi ni verifikovao. CIPS bi bio prinuđen da prihvati uplatnicu bez obzira o kom iznosu uplate se radi.

Praksa je pokazala da je Porezna uprava jedina institucija koja garantuje efikasnu prijavu i naplatu poreznih i drugih prihoda, budući da ima tačno definisane procedure, te mehanizme i mjere za postupanje i inspeksijski nadzor.

Bilo koja druga institucija nema ovako uređeno sistemsko rješenje, te se naplata prihoda odvija sa nizom poteškoća, sudskih postupaka i uz mogućnost tek povremenih kontrola.


Općinski prihodi su ionako na udaru, teško se naplaćuju bez odgovarajućeg mehanizma kao što je to institucija Porezne uprave, a na ovaj način bi se otvorila realna opasnost od erozije poreza.

Bez stvaranja drugog adekvatnog zamjenskog institucionalizovanog mehanizma, inicijativa nije prihvatljiva.“

DOSTAVLJENO:

1. Naslovu,
2. Arhiva.

**OPĆINSKI NAČELNIK**  
Mr. sc. Suad Huskić



# SLUŽBENE NOVINE

## ZENIČKO - DOBOJSKOG KANTONA

Godina XIV - Broj 9

ZENICA, petak, 22.05.2009.

### SKUPŠTINA

151.

Na osnovu člana 37. stav 1. tačka g) Ustava Zeničko-dobojskog kantona, Skupština Zeničko-dobojskog kantona, na 30. sjednici, održanoj dana 12.05.2009. godine, donosi

#### ZAKON

#### o porezu na imovinu, naslijeđe i poklon

#### DIO PRVI - OPĆE ODREDBE

##### Član 1. (Predmet)

Ovim zakonom uređuje se porez na imovinu, naslijeđe i poklon (u daljem tekstu: porez) na području Zeničko-dobojskog kantona (u daljem tekstu: Kanton), koji plaćaju fizička i pravna lica, postupak za utvrđivanje i naplatu, kao i postupak za povrat poreza.

##### Član 2. (Vrste poreza)

Ovim zakonom se propisuju slijedeći porezi:

- porez na imovinu,
- porez na naslijeđe i poklon.

##### Član 3. (Raspored prihoda)

Prihodi od poreza propisanih članom 2. ovog zakona se raspoređuju 100% u budžete općina.

#### DIO DRUGI – POREZ NA IMOVINU

##### Član 4. (Obveznici poreza na imovinu)

- Porez na imovinu plaćaju fizičko i pravno lice koji su vlasnici ili korisnici slijedeće imovine:

- poslovnog prostora koji se izdaje pod zakup,
  - stambene zgrade ili stana koji se izdaju pod zakup,
  - garaže koja se izdaje pod zakup,
  - parking prostor koji se izdaje,
  - zgrade ili stana za odmor i rekreaciju,
  - putničkog automobila, osim taksi vozila,
  - motocikla.
- Ako je imovina u vlasništvu više lica svako od njih je obveznik poreza srazmjerno dijelu vlasništva.

##### Član 5. (Način i visina plaćanja poreza na imovinu)

- Porez na imovinu plaća se godišnje u paušalnom iznosu za:

- poslovni prostor koji se izdaje pod zakup.....od 0,75 KM /m/2,
- stambenu zgradu ili stan koji se izdaju pod zakup.....od 0,75 KM /m/2,
- garažu koja se izdaje pod zakup.....od 1 KM/m2,
- parking prostor koji se izdaje.....od 1 KM/m2,
- za zgradu ili stan za odmor i rekreaciju .....od 1 KM/m2
- putnički automobil (osim taksi vozila):

do 1600 kubika	preko 1600 kubika
1) do 2 godine starosti... od 50 KM	od 100 KM,
2) od 2 do 5 godina starosti...od 35 KM	od 70 KM,
3) od 5 do 10 godina starosti...od 25 KM	od 50 KM,
4) preko 10 godina starosti..... od 10 KM	od 20 KM.

- za motocikl:
  - do 2 godine starosti..... od 30 KM,
  - preko 2 godine starosti.....od 10 KM.
- Porez na putnički automobil i motocikl plaća se godišnje u paušalnom iznosu pri registraciji vozila.
- Bez dokaza o plaćenom porezu na imovinu vozilo se ne može registrovati.

**Član 6.****(Oslobađanje od plaćanja poreza na imovinu)**

Porez na imovinu ne plaćaju:

- a) Bosna i Hercegovina, Federacija Bosne i Hercegovine, Kanton, grad, općina, kao i njihovi organi, organizacije i institucije,
- b) strana država pod uslovom reciprociteta,
- c) invalidno lice, na jedan putnički automobil i to:
  - 1) RVI, ako je rješenjem nadležne komisije za utvrđivanje stepena invalidnosti prema propisima o invalidskom osiguranju utvrđeno tjelesno oštećenje od najmanje 70%, kao i za utvrđeni stepen invalidnosti od 50% i više, ako se radi o amputacijama i težim oštećenjima ekstremiteta, koja uslovljavaju upotrebu vozila prilagođenih invalidnim licima;
  - 2) ostala invalidna lica, ako je rješenjem nadležne komisije za utvrđivanje stepena invalidnosti prema propisima o invalidskom osiguranju utvrđeno tjelesno oštećenje od najmanje 80% posebno organa za kretanje, potpuni gubitak ili oštećenje vida, teži oblik retardiranosti ili paralize,
- d) pravno i fizičko lice za poslovne prostore koje koriste prilikom obavljanja registrovane privredne djelatnosti,
- e) obrazovna, zdravstvena, penzijska, naučna, kulturna, vjerska i humanitarna ustanova ili udruženje građana, ako poslovni prostor koriste za obavljanje registrovane djelatnosti.

**Član 7.****(Plaćanje poreza na imovinu pri promjeni vlasnika)**

Pri promjeni vlasnika imovine iz člana 4. ovog zakona u toku kalendarske godine, novi vlasnik ne plaća porez na imovinu ako je taj porez plaćen od strane ranijeg vlasnika.

**Član 8.****(Razrez poreza na imovinu)**

Razrez poreza na imovinu vrši se unosom godišnjeg zaduženja sa porezne prijave koju na propisanom obrascu podnosi porezni obveznik sa stanjem imovine na dan 01.01. godine za koju se vrši razrez.

**Član 9.****(Obaveza dostavljanja podataka)**

Nadležni općinski organ koji vodi evidenciju o imovini iz člana 4. ovog zakona dužan je dostaviti Poreznoj ispostavi Kantonalnog poreznog ureda (u daljem tekstu: Porezna ispostava) podatke o vlasniku i njegovoj imovini, a sve

promjene nastale u toku tekuće godine u roku od 15 dana od dana nastanka promjene vlasništva.

**DIO TREĆI – POREZ NA NASLIJEDE I POKLON****Član 10.****(Predmet plaćanja poreza)**

- (1) Porez na naslijeđe i poklon plaća se na nekretninu koju nasljednik i poklonoprimalac nasljeđuje, primi na poklon ili stekne po drugoj osnovi bez naknade, kao i na pravo uživanja, odnosno korištenja na nekretninu koju fizičko lice stiče na teritoriji Kantona na osnovu Zakona o nasljeđivanju („Službeni list SR Bosne i Hercegovine“, broj 7/80 i 15/80), odnosno ugovora.
- (2) Porez na naslijeđe i poklon plaća se i na pokretnu stvar ako joj je pojedinačna ili ugovorena vrijednost veća od 2.000,00 KM.

**Član 11.****(Obveznik poreza)**

- (1) Obveznik poreza na naslijeđe i poklon je fizičko i pravno lice koje na teritoriji Kantona naslijedi ili primi na poklon imovinu na koju se plaća porez na naslijeđe i poklon.
- (2) Obveznik poreza na naslijeđe i poklon je i lice koje naslijedi ili primi na poklon pravo uživanja ili korištenja nekretnine.

**Član 12.****(Plaćanje poreza usljed odricanja od nasljedstva i poklona)**

Ako se nasljednik, odnosno poklonoprimalac odrekne nasljedstva ili poklona ili ga ustupi, porez na naslijeđe i poklon plaća lice kojem je nasljedstvo ili poklon pripalo, ili mu je ustupljeno.

**Član 13.****(Nastajanje obaveze plaćanja)**

- (1) Obaveza plaćanja poreza na naslijeđe i poklon nastaje u trenutku pravosnažnosti rješenja o nasljeđivanju, odnosno u trenutku prijema poklona.
- (2) Poklon se smatra primljenim u trenutku potpisivanja ugovora o poklonu, a ako ugovor nije zaključen, u trenutku prijema poklona.

**Član 14.****(Nastanak obaveze usljed opterećenosti nekretnine pravom uživanja)**

Ako je naslijeđena ili na poklon primljena nepokretna

imovina opterećena pravom uživanja, obaveza nasljednika, odnosno poklonoprimaloca za plaćanje poreza na naslijeđe i poklon nastaje po prestanku prava uživanja.

### **Član 15. (Osnovica poreza)**

- (1) Osnovica poreza na naslijeđe i poklon je tržišna vrijednost naslijeđene ili na poklon primljene imovine u trenutku nastanka porezne obaveze nakon odbitka dugova i troškova koji terete imovinu na koju se plaća ovaj porez.
- (2) Osnovica iz stava (1) ovog člana umanjuje se i za iznos sredstava koja je nasljednik, odnosno poklonoprimalac uložio u imovinu koja je predmet naslijeđa ili poklona prije nastanka porezne obaveze.

### **Član 16. (Utvrđivanje tržišne vrijednosti)**

- (1) Pod tržišnom vrijednošću naslijeđene ili na poklon primljene imovine podrazumjeva se tržišna vrijednost iste koja se postiže ili se može postići na tržištu u trenutku nastanka porezne obaveze.
- (2) Tržišnu vrijednost iz stava (1) ovog člana procjenjuje stručna komisija (u daljem tekstu: Komisija) koju imenuje općinsko vijeće, a koju čine predsjednik i dva člana.
- (3) U Komisiju mogu biti imenovane osobe koje imaju VII stepen stručne spreme iz oblasti građevinarstva, arhitekture, geodezije, poljoprivrede, prava i ekonomije i najmanje pet godina radnog iskustva u struci i spremi.
- (4) Komisija se imenuje na period od 2 (dvije) godine.
- (5) Načelnik općine pravilnikom propisuje način rada Komisije, odnosno propisuje kriterije na osnovu kojih se vrši utvrđivanje tržišne vrijednosti naslijeđene ili na poklon primljene imovine.
- (6) Predsjedniku i članovima Komisije pripada naknada za rad u Komisiji u visini koju utvrđuje općinsko vijeće.
- (7) Vlasnik, odnosno korisnik naslijeđene ili na poklon primljene imovine dužan je Komisiji dopustiti pristup imovini radi procjene tržišne vrijednosti iste.

### **Član 17. (Stopa poreza)**

Porez na naslijeđe i poklon plaća se po stopi od 5%.

### **Član 18. (Oslobađanje od poreza)**

Porez na naslijeđe i poklon ne plaća:

- a) nasljednik, odnosno poklonoprimalac prvog nasljed-

nog reda, supružnik ako je drugog nasljednog reda, roditelj kada naslijeđuje i prima na poklon imovinu od djece i maloljetno dijete bez oba roditelja,

- b) nasljednik drugog nasljednog reda kada naslijeđuje ili prima na poklon jednu stambenu zgradu, odnosno jedan stan, pod uslovom da je sa ostavioecem u trenutku njegove smrti, odnosno sa poklonodavcem u trenutku primitka poklona, živio u zajedničkom domaćinstvu i da on i članovi njegove porodice nemaju drugi stan u vlasništvu,
- c) nasljednik drugog nasljednog reda kada naslijeđuje ili prima na poklon obradivo poljoprivredno zemljište, ako mu je poljoprivreda osnovno zanimanje,
- d) nasljednik, odnosno poklonoprimalac, brat i sestra pod uslovom da se ta imovina ne može otuđiti u roku od 5 godina,
- e) Država Bosna i Hercegovina, Federacija Bosne i Hercegovine, Kanton, grad, općina, njihovi organi i institucije, te ustanova ili udruženje građana vjerskog ili humanitarnog karaktera.

### **Član 19. (Oslobađanje predmeta od poreza)**

- (1) Porez na naslijeđe i poklon ne plaća se na:
  - a) predmete domaćinstva,
  - b) imovinu na koju nasljednik, odnosno poklonoprimalac ne može steći pravo vlasništva, pravo uživanja, odnosno korištenja,
  - c) imovinu koja je naslijeđena ili na poklon primljena, a koju porezni obveznik ustupi bez naknade Državi Bosni i Hercegovini, Federaciji Bosne i Hercegovine, Kantonu, gradu, općini, njihovim organima i institucijama, te ustanovi ili udruženju građana vjerskog ili humanitarnog karaktera.
- (2) Porez plaćen prije ustupanja naslijeđa ili poklona ne vraća se.

### **Član 20. (Oslobađanje od poreza između bivših supružnika)**

Porez na naslijeđe i poklon ne plaća se kad se uređuju imovinski odnosi bivših supružnika.

### **Član 21. (Organ razrezivanja poreza)**

- (1) Porez na naslijeđe i poklon razrezuje Porezna ispostava na čijem području se nalazi naslijeđena ili na poklon primljena imovina.
- (2) Ako naslijeđena imovina, odnosno poklon sadrži samo pokretnu imovinu, porez razrezuje nadležna Porezna ispostava u prebivalištu poreznog obveznika.

- (3) Ako se naslijeđena ili na poklon primljena nepokretna imovina nalazi na području dviju ili više općina, razrez poreza vrši Porezna ispostava prema mjestu gdje se imovina nalazi.

#### **Član 22.**

##### **(Organi obavezni za dostavljanje rješenja i ugovora)**

Sudovi, organi uprave i notari dužni su rješenja o nasljeđivanju i ugovore o poklonu nepokretne i pokretne imovine dostaviti nadležnoj Poreznoj ispostavi u roku od 15 dana od dana pravosnažnosti rješenja, odnosno ovjere ugovora.

### **DIO ČETVRTI – PODNOŠENJE PRIJAVE, OBRAČUN I RAZREZ POREZA, ROK I MJESTO PLAĆANJA**

#### **Član 23.**

##### **(Rok podnošenja porezne prijave na imovinu)**

- (1) Prijavu poreza na imovinu porezni obveznik je dužan podnijeti nadležnoj Poreznoj ispostavi do 31. januara tekuće godine prema stanju na dan 01. januara tekuće godine za koju se odnosi obaveza.
- (2) Za imovinu stečenu u toku godine prijava se podnosi u roku od 15 dana od dana sticanja te imovine, a porez se obračunava i razrezuje srazmjerno vremenu od dana sticanja imovine do kraja godine u odnosu na godišnje zaduženje.
- (3) Prijava za imovinu koja se izdaje pod zakup podnosi se sa danom izdavanja pod zakup.
- (4) Prijavu poreza na imovinu na motorna vozila obveznik podnosi prilikom registracije vozila.
- (5) Oblik i sadržaj porezne prijave iz stava (1) ovog člana propisuje ministar Ministarstva finansija Zeničko-dobojskog kantona (u daljem tekstu: Ministar finansija) Pravilnikom o primjeni odredaba Zakona o porezu na imovinu, naslijeđe i poklon.

#### **Član 24.**

##### **(Rok i mjesto plaćanja poreza na imovinu)**

- (1) Porez na imovinu obveznik je dužan platiti u roku od 15 dana od krajnjeg roka za podnošenje porezne prijave, odnosno do 15. februara tekuće godine, a za imovinu stečenu u toku godine u roku od 15 dana od dana podnošenja prijave.
- (2) Porez na imovinu vozila plaća se pri registraciji vozila.
- (3) Porez na nepokretnu imovinu plaća se prema mjestu gdje se imovina nalazi, a porez na pokretnu imovinu plaća se prema mjestu prebivališta poreznog obveznika.

#### **Član 25.**

##### **(Rok podnošenja porezne prijave na naslijeđe i poklon)**

Obveznici poreza na naslijeđe i poklon dužni su poreznu prijavu za razrez poreza podnijeti u roku od 15 dana od dana zaključivanja ugovora, odnosno od dana prijema rješenja o naslijeđu.

#### **Član 26.**

##### **(Obveznici dostavljanja podataka)**

- (1) Banka, organ uprave, sud i drugo pravno i fizičko lice dužni su na zahtjev Porezne ispostave dostaviti podatke kojima raspolažu, ako su ti podaci od značaja za utvrđivanje njihove porezne obaveze ili poreznih obaveza drugih lica sa kojima su u poslovnom odnosu.
- (2) Nadležna općinska služba koja izdaje odobrenje za građenje i upotrebnu dozvolu dužna je primjerak odobrenja za nekretnine oporezive po ovom zakonu, dostaviti i Poreznoj ispostavi.

#### **Član 27.**

##### **(Postupak usljed netačnosti podataka u prijavi)**

Ako Porezna ispostava u postupku razreza poreza ustanovi da podaci koje je obveznik poreza naveo u poreznoj prijavi ne odgovaraju stvarnom stanju, postupak utvrđivanja poreza na imovinu utvrdit će se shodno odredbama Zakona o poreznoj upravi Federacije Bosne i Hercegovine („Službene novine Federacije Bosne i Hercegovine“, broj 33/02 i 28/04, u daljem tekstu: Zakon o poreznoj upravi).

#### **Član 28.**

##### **(Rok za donošenje rješenja o utvrđivanju, odnosno oslobađanju od poreza na naslijeđe i poklon)**

Nadležna Porezna ispostava u roku od 30 dana od dana prijema prijave, pravosnažnog rješenja ili ugovora, donosi rješenje o utvrđivanju, odnosno oslobađanju od poreza na naslijeđe i poklon.

#### **Član 29.**

##### **(Rok i mjesto plaćanja poreza na naslijeđe i poklon)**

- (1) Porez na naslijeđe i poklon plaća se u roku od 90 dana od dana prijema rješenja.
- (2) Porez na naslijeđe i poklon za nekretnine plaća se prema mjestu gdje se ta nekretnina nalazi, a za pokretnu imovinu prema mjestu prebivališta poreznog obveznika.

**DIO PETI – PRINUDNA NAPLATA, KAMATA, POVRAT, ŽALBA I ZASTARA****Član 30.****(Primjena Zakona o poreznoj upravi u Federaciji Bosne i Hercegovine)**

- (1) Na pitanja zastarjelosti razreza, prinudne naplate poreza i kamata, povrata pogrešno ili više plaćenog poreza, plaćene kamate, troškova prinudne naplate i žalbenog postupka, primjenjivat će se odgovarajuće odredbe Zakona o poreznoj upravi.
- (2) Prekršajni postupak ne može se pokrenuti niti voditi kada prođe tri godine od dana kada je prekršaj izvršen.

**Član 31.****(Nadzor nad obračunavanjem i plaćanjem poreza)**

Nadzor nad obračunavanjem i plaćanjem poreza utvrđenim ovim zakonom vrši nadležna Porezna ispostava.

**DIO ŠESTI - KAZNE NE ODREDBE****Član 32.****(Kaznene odredbe za pravno lice, organ uprave, odnosno notara)**

- (1) Novčanom kaznom u visini od 500,00 KM do 15.000,00 KM kaznit će se pravno lice, organ uprave, odnosno notar ako:
- ne dostavi podatke o vlasniku i njegovoj imovini (član 9.),
  - u roku ne dostavi rješenje o nasljeđivanju ili ugovor o poklonu (član 22.),
  - ne podnese ili u roku ne podnese prijavu za razrez poreza (član 23. i 25.),
  - u roku ne plati porez (član 24. i 29.),
  - na zahtjev Porezne ispostave ne dostavi podatke kojima raspolaže (član 26.),
  - ne dozvoljava ili ometa izvršenje postupka prinudne naplate (član 30.).
- (2) Novčanom kaznom za prekršaj propisan u stavu (1) ovog člana kaznit će se i odgovorno lice u pravnom licu, odnosno organu uprave, u visini od 50,00 KM do 3.000,00 KM.

**Član 33.****(Kaznene odredbe za fizičko lice)**

Novčanom kaznom od 20,00 KM do 1.500,00 KM kaznit će se za prekršaj porezni obveznik fizičko lice ako:

- ne podnese ili u roku ne podnese prijavu za razrez poreza (član 23. i 25.),

- u roku ne plati porez (član 24. i 29.),
- na zahtjev Porezne ispostave ne dostavi podatke kojima raspolaže (član 26.),
- ne dozvoljava ili ometa izvršenje postupka prinudne naplate (član 30.).

**DIO SEDMI - PRIJELAZNE I ZAVRŠNE ODREDBE****Član 34.****(Obaveze do stupanja na snagu ovog zakona)**

Porezne obaveze koje su nastale do dana stupanja na snagu ovog zakona izvršit će se prema propisima koji su važili u momentu nastanka porezne obaveze.

**Član 35.****(Rok za donošenje pravilnika)**

Načelnik općine će u roku od 30 dana od dana stupanja na snagu ovog zakona donijeti Pravilnik o načinu rada Komisije i kriterijima na osnovu kojih se vrši utvrđivanje tržišne vrijednosti naslijeđene ili na poklon primljene imovine iz člana 16. stav (5) ovog zakona.

**Član 36.****(Provedbeni propisi)**

Ministar finansija donijet će pravilnik iz člana 23. stav (5) ovog zakona u roku od 30 dana od dana stupanja na snagu istog.

**Član 37.****(Primjena podzakonskih propisa koji su u primjeni)**

Podzakonski propisi doneseni na osnovu propisa koji su u primjeni do dana stupanja na snagu ovog zakona, primjenjivat će se do donošenja novih u skladu sa ovim zakonom ukoliko nisu u suprotnosti sa istim.

**Član 38.****(Rok za podnošenje porezne prijave za imovinu koja se oporezuje po ovom zakonu)**

Porezni obveznici koji na dan stupanja na snagu ovog zakona imaju imovinu koja se oporezuje po ovom zakonu, a za istu nisu podnijeli poreznu prijavu, dužni su istu podnijeti u roku od 30 dana od dana stupanja na snagu ovog zakona.

**Član 39.****(Primjena federalnih propisa)**

Ako ovim zakonom pojedina pitanja iz oblasti poreza

nisu regulisana shodno se primjenjuju federalni propisi iz ove oblasti.

**Član 40.**  
**(Prestanak važenja propisa)**

Danom stupanja na snagu ovog zakona prestaje da važi Zakon o porezima Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 13/08).

**Član 41.**  
**(Stupanje na snagu)**

Ovaj zakon stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 01-02-12601/09  
Datum, 13.05.2009. godine  
Zenica

**PREDSJEDAVALAČI**  
**Sejad Zaimović, s.r.**

152.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 30. sjednici održanoj 12.05.2009. godine, donosi

**Z A K O N**  
**o izmjeni i dopuni Zakona o policijskim službenicima Zeničko-dobojskog kantona**

**Član 1.**

U Zakonu o policijskim službenicima Zeničko-dobojskog kantona („Službene novine Zeničko-dobojskog kantona“ broj: 8/06 i 20/07) u članu 130. u stavu (1) riječi „31. jula 2007.“ zamjenjuju se riječima „31. decembra 2010.“

**Član 2.**

Nakon člana 130. dodaje se novi član 130a. koji glasi:

**„Član 130a.**  
**(Prelazna odredba o izuzimanju od osnovne obuke)**

Izuzetno od odredbi Zakona o policijskim službenicima Zeničko-dobojskog kantona, u roku od šest mjeseci od dana stupanja na snagu ovog zakona, policijski organ može

izuzeti od primjene članove 55. i 56. Zakona o policijskim službenicima Zeničko-dobojskog kantona, za kandidate za policijske službenike koji zadovoljavaju slijedeće uslove:

- da su uspješno prošli proces odabira u skladu sa odredbama dijela III, poglavlje II, odjeljak C Zakona o policijskim službenicima Zeničko-dobojskog kantona i
- da su završili osnovnu policijsku obuku, na koju su upućeni od strane Ministarstva unutrašnjih poslova Zeničko-dobojskog kantona, nakon stupanja na snagu Zakona o policijskim službenicima Zeničko-dobojskog kantona.”

**Član 3.**

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-12604/09  
Datum, 13.05.2009. godine  
Zenica

**PREDSJEDAVALAČI**  
**Sejad Zaimović, s.r.**

153.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 30. sjednici održanoj 12.05.2009. godine, donosi

**ZAKON**  
**o izmjenama Zakona o unutrašnjim poslovima Zeničko-dobojskog kantona**

**Član 1.**

U Zakonu o unutrašnjim poslovima Zeničko-dobojskog kantona – prečišćeni tekst („Službene novine Zeničko-dobojskog kantona“, broj: 15/04 i 11/05), u članu 28. stav 5. riječ „glavnog“ zamjenjuje se riječju „samostalnog“, a riječ «dvije» zamjenjuje se riječju «tri».

**Član 2.**

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-12602/09  
Datum, 13.05.2009. godine  
Zenica

**PREDSJEDAVALAČI**  
**Sejad Zaimović, s.r.**

288.

Na osnovu člana 158. stav 2. Poslovnika Skupštine Zeničko-dobojskog kantona- Prečišćeni tekst („Službene novine Zeničko-dobojskog kantona“, broj: 12/09, 19/09 i 5/10-isp), Skupština Zeničko-dobojskog kantona na 11. sjednici, održanoj 07.09.2011. godine, donosi:

### AUTENTIČNO TUMAČENJE

**odredbe člana 6. stav 1. tačka a) Zakona o porezu na imovinu, naslijeđe i poklon ("Službene novine Zeničko-dobojskog kantona", broj: 9/09)**

#### I

Utvrđuje se autentično tumačenje odredbe člana 6. stav 1. tačka a) Zakona o porezu na imovinu, naslijeđe i poklon („Službene novine Zeničko-dobojskog kantona“, broj: 9/09, u daljem tekstu: Zakon), a kojim se precizira pravilan smisao navedene odredbe.

#### II

Tekst člana 6. stav 1. tačka a) Zakona glasi:

„Porez na imovinu ne plaćaju:

a) Bosna i Hercegovina, Federacija Bosne i Hercegovine, Kanton, grad, općina, kao i njihovi organi, organizacije i institucije,“.

Pravilan smisao člana 6. stav 1. tačka a) je:

„organi, organizacije i institucije navedene u citiranoj odredbi su samo oni organi organizacije i institucije osnovane u skladu sa Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“ broj: 35/05) i drugim (ranijim) propisima, kao organi uprave i upravne organizacije.

Na javna preduzeća i društva osnovana u skladu sa Zakonom o privrednim društvima („Službene novine Federacije Bosne i Hercegovine“ broj: 23/99, 45/00, 2/02, 6/02, 29/03, 68/05, 91/07, 84/08, 7/09 i 63/10) i Zakonom o javnim preduzećima u Federaciji Bosne i Hercegovine („Službene novine Federacije Bosne i Hercegovine“ broj: 8/05, 81/08 i 22/09) ne odnosi se navedena odredba, jer ista nisu organi uprave i upravne organizacije, već kao javna preduzeća posluju na tržištu prvenstveno radi sticanja dobiti, uz pružanje i određenih javnih usluga u skladu sa povjerenim javnim ovlaštenjima.

#### III

Autentično tumačenje se primjenjuje i važi od dana primjene odredbe Zakona za koju se daje autentično

tumačenje i objavit će se u "Službenim novinama Zeničko-dobojskog kantona".

Broj: 01-02-22781/11  
Datum, 08.09.2011. godine  
Zenica

**PREDSJEDAVAJUĆI**  
**Miralem Galijašević, s.r.**

### VLADA

289.

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj: 7/10) i člana 30. Zakona o izvršenju Budžeta Zeničko-dobojskog kantona za 2011. godinu („Službene novine Zeničko-dobojskog kantona“, broj: 4/11), na prijedlog Ministarstva za privredu, Vlada Zeničko-dobojskog kantona, na nastavku 27. sjednice, održanom 02.08.2011. godine, d o n o s i

### O D L U K U

**o odobravanju finansijskih sredstava subvencioniranju uvođenja i certifikacije međunarodnih standarda za upravljanje kvalitetom privrednom društvu „Krivaja-TMK“ d.o.o. Zavidovići**

#### Član 1.

##### (Predmet)

Odobravaju se finansijska sredstva privrednom društvu koji se bavi proizvodnjom montažnih kuća „Krivaja-TMK“ d.o.o. Zavidovići, u iznosu od 15.000,00 KM (slovima: petnaest hiljada konvertibilnih maraka), na ime subvencioniranja uvođenja i certifikacije međunarodnih standarda za upravljanje kvalitetom NEN-EN-ISO 14001-2004.

#### Član 2.

##### (Ekonomski kod)

Odobrena sredstva iz člana 1 ove odluke isplatit će se iz Budžeta Zeničko-dobojskog kantona za 2011. godinu, razdjel 18, budžetska organizacija 01, potrošačka jedinica 0001, ekonomski kod 614 500, pozicija „Subvencije preduzećima u privatizaciji i poticaj u industriji“.

#### Član 3.

##### (Provođenje Odluke)

Za realizaciju ove odluke zadužuju se Ministarstvo za privredu i Ministarstvo finansija, svatko u okviru svoje nadležnosti.